

左龔外集

廿

六十

左龔外集目錄

卷二十

貞孝唐大姑誄 二頁

翟安道妻馮氏誄 一頁

鄧亞珍誄 一頁

鹽城陶君誄 三頁

何大姑哀讚 二頁

党母李孺人哀讚 二頁

呂森妻王夫人哀詞 一頁

祭夏口火神廟文 一頁

萬載孝廉方正于達璋八十壽言 一頁

梁山皮君壽言 一頁

沈夫人五十壽序 二頁

招蝙蝠文 一頁

軫春思詞 一頁

悲秋詞 一頁

休思賦 二頁

曠情賦 二頁

出峽賦 二頁

弔旅冢賦 一頁

程于直冠子箴 一頁

函谷關銘 一頁

廣元公立雨壇銘 一頁

溫江李龍丘玉珮銘 一頁

毬盤銘 一頁

秀山學宮鄉飲頌 一頁

鄆縣嘉禾頌 一頁

江水頌 一頁

六儒頌 二頁

倉場侍郎桂公清像贊 一頁

揚州前哲畫象記 三頁

眞州看山記 一頁

邢故拾遺 九頁

光漢室叢談 二頁

貞孝唐大姑誄

惟光緒六年正月十七日清苑唐大姑以死殉母仰悲軌極俯
終心禮即景幽誕長違昭世白日西頽愁雲掩噎逝水不歸容
光幽邁嗚呼哀哉夫其少膺靈粹長厲令節孝貫樞極心貞拚
石伸殊操于待年感昊天之恩極遐稽往烈行弗一軌寡能兼
全其道始終若斯者也昔柏舟自誓采於風詩曹娥孝德邯鄲
述碑爰迪前製洪宣懿則揚芳風于緇素寫哀心于翰墨誄曰
參墟藹慶斗曜甄明載育淑靈岐嶷夙成坤順貞元離明柔麗
爰柔克剛終溫且惠在盈思冲處逸思勤獻功魯績綜綵荆繡
黃裳元吉素絢彪文蹈和姬典衍緒羸焚顧史成箴披圖仰鏡
爰式二儀光宣六行徽言宵永鴻章晨映藻馥滂葩茗鮮掇穎
緝言瓊祕鏘度璜和芳塵淵塞懿訓川施春英蕙郁朝茂蘭披
揚芬劉頌懋軌班儀珩範聿修輦箴斯肅雁采敷筵凰鳴貞卜


爰及待年清風昭穆不弔昊天羅斯煢獨星隅韜映陽燧淪精
琨礪翳采瓊珮摧芳城崩杞哭臺式巴貞誠申皦日哀結流霜
仰迪前徽俛型芳槩志存匪石貞嚴既雨舟矢共姜琴援衛女
寡鵠聆訶離鸞促柱緬懷漆室眷景寒泉承筐澗藻馨膳陔蘭
工宣漸緒典式施繁

禮內則施繁麥

蒸蒸乂孝肅肅承顏日月不居二

氣告沴招弭春祈股糜夕進周壁韜靈秦醫輟軫彼蒼者天胡
寧斯忍奄離顧復沈結彌留春輝晃影朝露先秋風生棟宇霜
繁廣除瞻顏失覲顧景增歎惟古有言靡依匪母謂天蓋高仰
瞻靡恃懷石荆臺沈衣越水寶玦淒涼瑤臺孔邇靈輓交轂連
理成林文禽馴隴玄兔依岑元宮窈窕重隧幽深締華彤管啟
曜玄陰伊陰陽之肇端播六列于閨箴胡斯美之獨鍾邈靈軫
其莫尋期靈淵于中河攀凱風于來南終倉天而永慕即元景
之幽潛表磨筭于趙山弘繡黼于巴吟庶風規之長式揚大雅

之徽音



翟安道妻馮氏誄

惟民國元年八月□□內江翟安道妻馮夫人以疾卒年二十有四嗚乎哀哉夫其少揀靈醇長弘淑問含芬華之芳列茂蘋蘩之雅訓雖容衣委世亦馨烈弗泯乃述誄曰

穆穆夫人惠心淵塞肅穆婦順靜恭女德厲矩周摯宣功魯績肅肅蘋筐萋萋葛綌禮順德成敬資義立撫典成箴臨圖弘式欽若徽音洪宣淑則綜華彤管銘徽玄石懿問孔昭芳猷允迪華景方中良辰莫借謹露朝團梧霜宵集春卉凋紅秋蕪翦碧瑤草徒芳錦花長溼凝釭不辰遺絃知寂窅窅屏帷悽悽翰墨式載瓊芳英華无斁

鄧亞珍誄

惟年月日四川省會議員前重慶司法部長鄧君亞珍卒廣
庭霜積總帳風淒玄雲無極西日潛暉嗚乎哀哉友朋來遠怛
惻傷摧悲幽光之永翳痛玄軫之常違銘以述德誄以表哀誄
曰

井緯鍾祥鄧林宣曜載育國楨含章體妙白鳳甄靈碧雞締藻
春煒滂葩秋英碭顥粵有陽九國步方屯西華汨典朔沴噓昏
芳圖輟記靈牒湮原詩宣焦穫禮失伊川爰陟青丘聿懷赤伏
擢翼陽溟回軒嵎谷綜藻羽琤抗稜氈幄揮迹姬臺陸維禹服
洋洋俊穎臺臺令圖道昭時晦陰伏陽荼俛閔江論仰鏡軒符
矢音卷谷綜軌康衢赤鳥知來黃麟臧往雷瑄噓咏霜臯振響
木鐸春宣玉瑩宵朗龍燭暉幽魚鰲桴想折肱豐沛錯履離明
屯林婉迹需沚孚光琴援樗里佩結君黃顥躋思靖嘉遜知貞

鹽城陶君誄

惟民國三年四月□□前候選訓導鹽城陶君卒春秋五十有八嗚乎哀哉君諱鴻恩字湛材歷署豐縣訓導贛榆縣教諭邳州學正省舉蘇路北綫坐辦前後主辦城防保練重濬泮池改建尊經閣修復天妃石礎二閘興立尙志書院高等小學義倉施藥局恤嫠會戒烟局栖流所工費巨萬不請公錢六賑民災再襄清賦省保知縣數舉卓異皆辭不居辛亥光復兵匪窺城以君獲完其卒也傾縣祖贈道路舉哀過喪以□月□日拊祀甘棠精舍從民望也惟君法施于民禦災捍患生有休烈歿而德存民功曰庸允符祀典里人累請綴誄書旃上之司勳副在史官傳示無垠永永億年誄曰

惟陶之先執伎守官官有世功因以氏焉曄曄夷侯翼漢作臣休有烈光奕世燿燿聿來胥宇淮海之原亦越于君不隕厥問

幼而克嶷齊聖廣淵長體中和敦龐允元降命上乾天嘏之純
德與性鍾思樂朝聞粵在過庭詩禮彬彬兼苞載籍蓄德前言
玉振金聲光輝日新非惟揚華寔秉道真惟孝友于人言不間
因睦合族祇事高年假階學官流化元元初歷豐城育德流川
移化贛榆五品式訓歸歟吾黨邦政必聞州郡禮招束帛棁棁
屈己體公股肱之選塞違昭德侃侃闇闇涅而不緇在磨不磷
逶迤素絲退食公門含章朝夕從事獨賢爰始在公尤勤民隱
歲時巡野存恤孤惻爰及矜人鰥寡引恬邑有大穰發穀贍民
有積有倉有榦有年遠邇忻忻襁負歸仁江淮大浸請卹未頒
義損萬緡入粟助官楚文抒難曷足擬焉追維建國教學爲先
導闡泮宮宮牆重仞洽和百禮籩豆司存益建授堂哀求異典
授餐適館童冠斷斷昔誦緇衣今見其人詔書興學庠序列陳
樂育菁莪彪之用文餘子莘莘左塾循循譽髦之美非此孰云

海濱廣斥厥土白墳洪水湯湯懷襄之患眾咨俾乂僉曰惟君
遂迹禹功敷土湮川興復閘門仍其舊貫啟閉從時民無後艱
水泉潤下稼穡作蕃辛壬詔書升租竈田君奉簿書曾不浹旬
則壤有程成賦維均民無橫徭里旅不煩遠人來懽樂受一廛
時急商征大東寤嘆爲陳譚告如誦沆泉會邁海氛檄總鄉練
民知柙柝國有藩垣退司里甲挽攘發聞百姓黎元蒙祉乂安
維時鐵路同軌淮濱羽畎嶧陽迄于泗濱昭我由庚王道便便
孰是宣勞曰惟哲人自君徂西省息公錢儉擬羔羊厲志伐檀
吏人百司莫不恪純四民趨赴會計欣懽惟君之澤容保黎民
惟君之節貞固自天如玉之堅如山之峻強衙不畏世擬仲山
始謗終謠配產作鄰邦令維新民未知信漂搖毀室亦孔之瘳
執德不回卒弘大賁匪躬之義謇謇忘身匹夫有志勇奪三軍
爰迄有成百里瞻言雖在九臯鶴鳴聞遠明明側陋牧伯昭聞

本朝錄功三錫以輦幡然明讓歸善稱親退樂居貞高蹈濯鱗
富貴非我擬之浮雲方遂泌丘以禮盤桓庶慕前賢確爾無悶
屬邦改命百六作艱驕將阻兵野有宿奸君來自西民望如雲
爰峙糗糧益修楨榦軍儲輸實商弗變塵鞠人保居不閉四門
海邦丕冒實賴厥勛惠我無疆施及子孫百世不忘庶幾微管
緬維上哲咸享百年皇人制命曰仁長存矧惟令德作我惠君
洄酌民歸公劉之仁宜膺天休福祉便蕃如岡如陵南山不騫
壽終金石等算彭篴如何不弔氛戾奄臻曾不愍遺邈世高軒
升陟於皇登靈在天遺令素棺彌留顧命禮存寧儉永詔後人
嗚乎哀哉日月有時卜宅卽安祖載在庭商祝拂棺庶襚充箱
方策載陳爲辭昭晰卽體山塋孝孤綰杖悼痛摧肝同人號咷
泣涕洟漣素軌載途羽楫湮川執紼千餘道路汎瀾轆車轆結
輪不得前凡百黎氓若喪鄭產民之秉思寤擗幽殷桑者投鉤

耕夫釋耰老弱相攜婦稚載奔奔逐相隨慕戀莫攀擗踴拊心
號泣秋旻何辜于天殲我良人死如可贖願百其身嗚乎哀哉
濟濟俊髦祈祈縉紳瞻望弗及盼音靡聞殄瘁之傷孰不永嘆
昔詢黃髮俾我罔愆今其如何棄我遐遷瞻彼河干甘棠勿翦
新廟奕奕精靈所安爰始爰謀請依祀典有恡有醴恭肅明神
作配嵩高如甫及申穀我士民下邑康年示我典型仰止高山
何以述德聲施管弦何以累功表之素旃生有令聲歿有遺勳
綿之日月永永無圻歲世長存億業不刊嗚乎哀哉